


Koleksi Cerita Kanak-Kanak

Damak Raja Bohong

1





Gong dibunyikan sebaik saja menerima arahan raja.
Seorang pembesar berdiri. Dia membaca satu watakah.

"Hari ini kita akan menyaksikan perlawanan bohong di antara Wak Damak dengan Raja-raja Bohong dari India. Hadiahnya tiga buah kapal kepada Wak Damak kalau dia menang dan hukum mati kalau Wak Damak kalah," baca pembesar itu daripada watakah.

Rakyat yang hadir bersorak gembira. Raja memberi perintah supaya pertandingan itu dimulakan.

"Mulakan! Siapa yang akan memulakan?" tanya raja.

"Raja-raja bohong itu patut mulakan dulu kerana mereka bertiga. Patik seorang," jawab Wak Damak.

"Baik! Kamu mulakan dulu!" perintah raja kepada

peserta dari India.

Peserta pertama dari India bangun berdiri.

"Ayah patik seorang tukang kayu, pada suatu hari dia masuk ke hutan mencari kayu. Dia berjumpa dengan sebatang pokok yang amat besar."



"Dia cuba mengelilingi batang pokok itu. Dia mengambil masa tiga bulan mengelilingi batang pokok itu," cerita peserta pertama dari India.

"Sedap! Sedap!" titah raja sambil ketawa. Orang ramai juga ikut ketawa dan bersorak.

Gong dibunyikan. Peserta kedua dari Bangladesh bangun.

"Allahyarham ayah saya membuka perusahaan membuat perabot daripada rotan. Ketika dia mencari rotan, dia terjumpa sebatang pokok rotan. Umbinya sebesar jari kelingking. Batangnya sebesar batang kelapa. Pokok rotan itu menjulang naik ke langit. Ayah saya memanjat pokok itu hingga ke hujung. Pucuk rotan itu telah menembusi langit. Ayah saya sesat dan jatuh ke sebuah negeri lain. Tiga tahun baru dia berjaya turun semula ke umbi pokok rotan itu," cerita peserta yang kedua.

"Sedap! Sedap! Beta suka cerita kamu," kata raja sambil ketawa.

Rakyat bersorak lagi sambil bertepuk tangan. Riuhrendah suara mereka memekik dan ketawa.

Gong di palu. Peserta yang ketiga bangun berdiri. Orang ramai senyap menunggu dia bercerita.



"Ayah patik berniaga kerbau. Ada seekor daripada kerbau-kerbaunya itu amat besar. Seekor gagak yang terbang dari hujung tanduk kiri ke hujung tanduk kanan mengambil masa tiga bulan baru sampai. Begitulah besarnya kerbau itu tuanku," cerita peserta ketiga dari Utan Pradesh.

"Sedap! Sedap!" jerit raja sambil ketawa dan bertepuk tangan. Diikuti oleh sorakan orang ramai.

Sekarang giliran Wak Damak. Semua orang menumpu perhatian kepadanya.

Gong dipalu. Wak Damak berdiri. Mukanya agak ceria. Dia membetulkan songkok dan mengemaskan ikatan kain sarung yang dipakai. Suasana sunyi sepi. Raja merenung wajah Wak Damak. Semua orang ternanti-nanti cerita Wak Damak. Rakyat juga berada dalam perasaan cemas. Mereka bimbang Wak Damak kena hukum bunuh, jika tewas dalam pertandingan itu.

"Patik juga ada ayah. Tetapi sudah meninggal dunia. Allahyarham ayah patik seorang ahli budaya. Dia seorang

pemain rebana,"

"Pada suatu masa, dia menerima jemputan bermain rebana di majlis kenduri perkahwinan."



"Ayah patik bermain rebana di situ selama tiga hari. Apabila selesai dia membawa balik rebananya," cerita Wak Damak.

"Dia gantung rebana itu di bangsal. Tetapi gema rebana itu masih berbunyi. Entah berapa lama patik tidak ingat."

"Gema suara rebana itu terus mengaung di angkasa. Dum, dum, klong, klong, bunyinya," cerita Wak Damak.

"Gema suara rebana itu akhirnya berhenti apabila rebana ayah patik buruk," jelas Wak Damak.

"Selama mana sebiji rebana boleh buruk dan rosak?" tanya raja.

"Dua puluh lima tahun tuanku," jawab Wak Damak.

"Sedap! Sedap!" jerit raja dengan gembira. Orang ramai bersorak gembira. Kali ini lebih kuat dan gamat.

"Dari mana kamu dapat kayu buat rebana sehingga sehebat itu?" tiba-tiba peserta pertama bertanya Wak Damak.



"Ayah aku beli kayu daripada ayah kamu," jawab Wak Damak.

Raja bertepuk tangan apabila mendengar jawapan

Wak Damak.

"Dari mana ayah kamu mendapat rotan untuk membuat rebana?" tanya peserta kedua.

"Ayah aku beli rotan ayah kamu," jawab Wak Damak.

Raja terus ketawa dan bertepuk tangan. Orang ramai turut bertepuk tangan.

"Dari mana pula ayah kamu mendapatkan kulit kerbau untuk membuat rebana begitu besar?" tanya peserta ketiga.

"Ayah kamu pelihara kerbau besar. Ayah akulah yang beli kerbau itu," jawab Wak Damak dengan senyuman lebar.

"Sedap! Sedap! Jawapan kamu tepat. Kamu menang Wak Damak," titah raja.

Gong dipalu. Seorang pembesar berdiri mengisytiharkan kemenangan Wak Damak.



Orang ramai terlompat-lompat bersorak gembira. Ada yang datang bersalaman dengan Wak Damak mengucapkan tahniah.

Tiga orang Raja Bohong itu tunduk kepala. Mereka kalah. Mereka terpaksa menyerahkan tiga buah kapal kepada raja seperti yang dijanjikan.

Raja mengampunkan Wak Damak. Raja menganugerahkan pangkat Datuk kepada Wak Damak. Wak Damak juga mendapat banyak wang.

Mulai hari itu, Wak Damak dibebaskan daripada jawatan penglipur lara di istana. Dia sekarang di gelar "Penglipur lara Diraja."